

## 1 TESARONAËKA'

E Pöl to te' voh non manih Körin, pare' kiun ke na a napan va po vaman varih Tesaronaëka' o kiun vamomoaan pe'. Tesaronaëka' voh a vöön apuh va pa muhin va Mësadonia', a vöön apuh pamëh to te' voh non sinten tahi'. Manih pa vakön vavih pe Pöl pa vatvus a soe, e' to vatvus momoaan a soe vih manih pa napan va Tesaronaëka'. Ka pusun in a ö ne' to vatvus a soe vih pamëh, no o kum te' va po vaman to sun en, (Aposol 17:1-14). A ma paeh va pa napan va po vaman poë varih, ee voh ro Jiu'. Ivëhkëk, a peo pee, ee ra napan to hikta te' ne pan ee ro Jiu'. Ka ma to Jiu' poë varih no a ma paeh va pee to pahan voh e pa hanan va pa vasunön e Ieesu'. Ke' ivëh, a tah no a ma te' susun po Jiu to puhio' suk voh, pare veo ke ee pe Pöl me a ma vamomhë pe', kee nö ee pa vöön va Beria'. Ko vasuksuk po' ne Pöl to vanö e Timoti', ke' nö en Tesaronaëka'. O poen ne' to hah ma', e' to vatvus en pa soe vih va pa ö nee to te' va ne.

Manih po kiun vëh ne Pöl to soe vavihvih ke Sosoenën, suk a napan va Tesaronaëka' to vaman ne, ko pah te' vaes e ne pa ma vu punis, me manih po iu pee, ee to koman ne e Pöl. E Pöl to iu vakikis non raoe manih po kiun vëh, pare' piun en pa hi pee manih pa taate' va pa mët.

A ma kiun varih to tataki va ne manih.

A potan avih pe Pöl, 1:1

E Pöl to soe vavihvih ke Sosoenën suk o vaman pee, 1:2-10

Vöhio' va pa ma taate' pe Pöl topniira napan va  
Tesaronaëka', 2:13-20; 3:1-13  
A ma taate' vih no a napan va po vaman se  
suksuk ne, 4:1-12  
O vavaasis va pa hah pe Ieesu' manih po oeh,  
4:13-18; 5:1-11  
A ma soe vakikis, me a soe ataaton pe Pöl, 5:12-  
28

*O Kiun Vavovoh Ne Pöl To Vanö Ke Na A Napan  
Va Tesaronaëka'*

<sup>1</sup> O kiun va'ih to tane' nös peö' e Pöl. Ke Saälas pen Timoti' to te' va'peh me a ne neo', kemöm vanö nös a potan avih pemöm manem peöm.

O kiun va'ih nemöm to vanö ka nös neöm, o kum te' varem to vaman nem e Sosoenën manih pa vöön va Tesaronaëka'. Eöm o kum te' varem to vaman nem e Tamaara Sosoenën, me e Ieesu' Kristo e Sunön pea.

Eö' to hinhin no' e Sosoenën pan, e' se ururuan a neöm pare' he' a neöm a taate' moomo.

*A Napan Va Tesaronaëka' To Öt Vakis E Ne Po  
Vaman Pee, Pare Te' Vatotoopin Ne Pa Matan E  
Sosoenën*

<sup>2</sup> A ma poen kurus nemöm to koman a no neöm, pamöm sosoe vavihvih ke nem e Sosoenën. Ka manih pa ma hin pemöm, nemöm to popoka' nem nös a ma éhnëëneöm manih pa ö nemöm to hinhin nem.

<sup>3</sup> Pamöm sosoe vavihvih ke nem e Sosoenën e Tamaara, suk a ma vaman peöm to kunkuin non a ma kokoman peöm. Köm nonok nem a ma taate' vih, manih pa ma kiu nöm to nonok nem, suk a taate' iu te' peöm. Emöm to soe vavihvih pet me e

nem pe Sosoenën, pan a ma kokoman peöm se te'  
kikis tamoaan ne. Suk eöm to anoeh nem e Sunön  
Sipoan pea Ieesu' Kristo se hah amot ma'.

<sup>4</sup> Kën kea me ra kën vamen, eöm to nat e nem  
pe Sosoenën to iu rakah e non peöm. Kemöm nat  
e nem pe Sosoenën to kon voh en peöm a napan  
koman pe'.

<sup>5</sup> Ka Soe Vih vëh nemöm to te' voh ka nös neöm,  
to hikta te' non pan o vahutët akuk. Ahik. A soe  
pamëh to tavus me voh o kikis. Köm ep vamaaka  
rakah em po vaman eh pemöm to tane' ma' pa  
Tuvuh Vasio!. Ke eöm koman to nat e nem pa taate'  
nemöm to nok voh, marën a va'aus a neöm po poen  
nemöm to te' va'peh me voh a no neöm.

<sup>6</sup> Ivëhkëk, eöm to kon a soe pe Sosoenën, ivëh,  
no a ma punis peo me o kamis to tavus suk voh  
manih peöm. Suk eöm me to vatet voh a ma taate'  
pemöm, me a taate' pe Sunön, ke Sunön kunkuin  
a ma kokoman peöm köm kon em po vaeö to tane'  
ma' pa Tuvuh Vasio'.

<sup>7</sup> Ivëh, nöm to vataare suk voh a taate' vih peöm  
manih pa napan varih, to vaman ne e Ieesu' Kristo  
to te' ne manih pa poa muhin varih, Mësadonia', me  
Akaea'.

<sup>8</sup> Eöm to vatvus a Soe pe Sunön manih pa napan.  
Ka soe pamëh nö vëvëhö' va en manih pa tanih po  
kamus. Ka soe pamëh to hikta te' varoe non manih  
Mësadonia', me manih Akaea'. Ahik! A napan va  
pa ma vöön kurus to pënton vahik voh ee, peöm to  
kon voh em pa Soe pe Sosoenën, paröm vaman em  
pe'. Ivëh, kemöm to hikta te' hah me nem ta meh  
soe nemöm se soe hah ka neöm.

<sup>9</sup> Ivëh, ka napan va pa ma muhin kurus

vavahutët suk vavi' e ne, pa hanan nööm to öt vah va ka möm, po poen nemööm to vos voh nös, pamööm te' va'peh me a no neöm. Ee to vavasoe suk e ne peöm to he' tonun e sosoenën vapikpiuk, paröm taneo em pa vaman e Sosoenën to'to' tamoaan. E' e Sosoenën vamaman, paröm tavus em a nap kiu pe'.

<sup>10</sup> Ee to vavasoe suk e ne peöm, to anoeh nem e Koa' pe Sosoenën vëh ne Sosoenën to kuin tane' hah poan pa mët. Po Poen ne Koa' Ieesu' se hah tane' ma' pa vöön va kin, e' se va'aus a ra, ko hehe a ra këh o heve pe Sosoenën vëh se tavus amot ma'.

## 2

### *E Pöl To Soe Tavus A Kiu Ne' To Nok Voh Manuh Tesaronaëka'*

<sup>1</sup> Kën kea me ra kën vamen, eöm to nat koman e nem pa kiu nemööm to nok voh pa ö nemööm to vavih voh nös manem peöm, to hikta se ro akuk non.

<sup>2</sup> Po vamomoaan nemööm to kehkeh nö nem nös peöm manem Tesaronaëka'. Emööm to te' nem manih pa vöön vëh Filipaë, pamööm taum o kamis nën. A napan va pa vöön pamëh to hinën kamööm. Ivëh, köm nat e nem, a nap peo rakah to he' tonun ka möm, pare vapikpiuk a möm. Ivëhkék, e Sosoenën pea to va'aus e non pemööm. Kemööm sun vakis e nem pa vatvus a Soe Vih pe' manih peöm.

<sup>3</sup> A hin pemööm manih peöm pa vaman e Ieesu' to hikta te' non pan o piuk. Emööm to hikta kokoaan nem a ma kokoman pemööm manih peöm, ke', emööm to kehkeh piuk ka no neöm. Ahik.

<sup>4</sup> E Sosoenën to punö' voh en pemöm. Ko vaman e non pemöm, pare' he' en pemöm pa kiu va pa vatvus a Soe Vih. Ko poen nemöm to vavaato nem, emöm to hikta iu nem a vamanman a napan, pan ee se vaeö in a kiu pemöm. Ivëhkëk, e Sosoenën koman to kiiki non a ma kokoman pemöm, ivëh, nemöm koman to iu suk nem eah, se vaeö in a kiu pemöm.

<sup>5</sup> Eöm to nat e nem, emöm to hikta iu panih nem a ma kokoman peöm, pa ö nemöm se nok ta ma soe vihvih, marën a rëh a ma te' kokoman peöm. E Sosoenën to nat e non pa tah pamëh, a man. Emöm me to hikta se koaan ka non neöm po kokoman pemöm, suk emöm to hikta te' me nem a taate' amun. Pamöm hikta se vamanman a no neöm, ko öt këh a neöm a ma moni' peöm.

<sup>6</sup> Emöm to hikta kehkeh kon nem to ähnan apuh manih peöm, me ro upöm te'.

<sup>7</sup> Oman, emöm to te' e nem o aposol pe Kristo, ivëh, kemöm se keh iu voh nem, emöm to antoen e nem pa soe ka neöm, köm va'aus voh em pemöm. Ivëhkëk, o poen nemöm to te' va'peh me voh a no neöm, emöm to te' me nem a taate' tö vamanih pe köövo to matop non e koa' sone' pe'.

<sup>8</sup> Suk ataaeh, emöm to vaeö me e nem peöm, pamöm iu vi rakah e nem peöm. Emöm to kehkeh va'aus e nem peöm pa Soe Vih pe Sosoenën, pare' hikta te' non pan, e' a soe varoe ko pamëh, emöm to vamatop me e nem pa mët, marën a va'aus a neöm. Suk ataaeh, eöm to tavus em a ma meh te' pemöm, pa ö nemöm to iu va nem.

<sup>9</sup> Kën kea me ra kën vamen, eö' to nat e no' peöm to kokoman hah e nem pa ma kiu hiva', me

a ma te' a vö'parean nemöm to nonok voh nem manih topnineöm. Emöm to kiu vëhva' rakah e nem manih peöm pa vavaasis a neöm a Soe Vih pe Sosoenën, pa ma popoen, me pa ma potan. Emöm to hikta antoen nem a he' punis a neöm pa matop a möm pa taëen.

**10** Eöm to nat e nem, e Sosoenën me to nat vahik voh en pa taate' nemöm to nok voh manih peöm, a napan varih to vaman voh e Ieesu' Kristo. Emöm to nok voh a ma taate' totoopin varih, to te' vih ne manih pa matan e Sosoenën, pamöm hikta nok ta hat.

**11** Eöm to inan e nem, pa ö nemöm to matop va ka no neöm, vamanih pa ö ne taman to matop va non a ma koa' pe'!

**12** Emöm to vavaasis a no neöm a soe va'ih, marën a kunkuin a ma kokoman peöm. Pamöm vakikis a neöm pa soe pemöm pan, eöm se suk vakis rakah a taate' vih to onöt non a taate' pe Sosoenën. E Sosoenën to vaoe voh a neöm, pan eöm se hop manih pa Matop Vih pe', ko kon a ö ihiho' vih, kuru me amot manuh pa vöön va kin.

*A Ta Tesaronaëka' To Vaman Vakis Rakah, Ee Pare Te' Ee Pa Ma Punis*

**13** Ka meh tah ivëh, emöm to sosoe vavihvih tamoan ke nem na e Sosoenën, suk eöm to kon a soe pe', nöm to tenan manih pemöm. A soe pamëh nöm to hikta kon va in eah manih pa soe pa te'. Ahik. Eöm to kon va em pe' manih pa soe koman pe Sosoenën. Ka soe pamëh e' a soe koman pe' to kiu non manih pa ma kokoman peöm, a napan varih to vaman voh e Sosoenën.

**14** Kën kea, me ra kën vamen, eöm to tavus vatoe me voh em pa ma kum te' varih to vaman voh e Sosoenën, pare te' ne manih pa muhin vëh, Jiutia'. A napan poë varih to vatös me voh ee pe Ieesu' Kristo. Ka ma punis nöm to taum, ee a ma punis no a napan koman va pa muhin peöm to he' a neöm. Ka ma punis poë varih to vatoe akuk va e ne manih, pa ma te' punis no a nap kiu pe Sosoenën to taum me voh manih pa koreero Jiu'.

**15** O Jiu', ee a napan poë varih, to ip vamët voh e Sunön pea Ieesu' Kristo, me ro te' vanënën soe, pare veo vawah ka möm pan emöm se këh a muhin pee, suk ataaeah, e Sosoenën to hikta vaeö me non raoe. Ee to rës me e ne po upöm te'.

**16** Pare pupunö' rakah e ne pa soepip a möm pa vavaasis a soe pe Ieesu' Kristo, manih po te' varih to hikta te' ne pan ee ro Jiu'. Suk ataaeah, ee to hikta iu ne a ö ne Sosoenën se kon hah a napan poë varih. Ee to nonok va ne manih, ivëh, no a ma hat pee se tatavus vapeo suk ne pa ma poen kurus, ko onöt non po poen no heve pe Sosoenën se taum raoe.

### *E Pöl To Iu Ep Hah Non A Ta Tesaronaëka'*

**17** Kën kea me ra kën vamen, a napan to nok voh a ra, ka vakëh ee pa ma si' poen. Kemöm hara' rakah va nem manih pa ö no e voe to te' ke non a ma koa' pe' pa ma si' poen. Emöm to hikta ep hah ka neöm. Ivëhkëk, o kokoman pemöm to te' avoe' e non manih peöm. Ivëh, kemöm eh rakah e nem pa taum këh ta hanan, nemöm se koe ke nös pa ep a neöm. Suk emöm to iu vi rakah e nem peöm.

**18** Emöm to iu itoe' rakah e nem pa nö nös peöm. Keö' koman e Pöl to pupunö' vakis tamoaan rakah

e no' pa ep këh ta hanan, nö' se koe nös, parö' ep a neöm. Ivëhkëk, e susun po ora' hat to susunpip e non pemööm pa nö nös peöm.

<sup>19</sup> O poen ne Sunön pea Ieesu' Kristo se hah ma', kataeah se nok a ra ka sun vakis me o vaeö manih pa mataneah? Emöm se kon ataeah to vataare non, a ö nemööm to nonok nem a ma kiu vih poë varih? Emöm se vaeö varoe suk a no neöm a napan va Tesaronaëka'.

<sup>20</sup> Oman rakah, eöm o maaka pemööm. Ke eöm koman to vavaeö a no möm sih.

### 3

*E Pöl To Vanö E Timoti' Manuh Pa Vöön Va  
Tesaronaëka', Marën A Vakikis O Vaman Pa Napan  
Va Pa Vöön Pamëh*

<sup>1</sup> Emöm to pah kokoman vörep e nem peöm, pamööm hikta onöt nem a anoeh varë. Emöm koman to nok em po kokoman, pan e' to vih non pemööm po' Saëlas se te' nem manih pa vöön vëh Atëns.

<sup>2</sup> Emöm to vanö ka nös neöm e kea pea Timoti'. Suk e' a te' pamëh to kiu va'peh me a no möm. Kemööm nonok nem a kiu pe Sosoenën. E' me se vava'aus a no möm pa vatvus a Soe Vih to soe suk non e Kristo. Emöm to vanö nös eah, marën a vakikis me a va'aus o vaman peöm.

<sup>3</sup> Pe' to hat non pa ö no a punis me kamis vëh, nööm to tataum nem tome' nok a neöm ka ma upöm peöm kokoman vatëh e ne pa ma tah poë varih. Eöm koman to nat e nem, pea se taum a ma vu punis poë varih.

<sup>4</sup> Ko poen nemööm to te' me voh a no neöm, emöm to soe vanat voh em peöm pan, ea kurus se taum

ee pa ma vu kamis to te' va ne manih. Eöm to nat e nem, kuru va'ih no a ma kamis poë varih to tavus vateera' ee manih pea.

<sup>5</sup> E' a pusun in a ö nö' to hikta se anoeh varë suk no'. Ivëh, nö' to vanö suk nös e Timoti' manem peöm, pan e' se inan po vaman peöm, pare' soe vanat hah a ma' neo'. Peö' to nanaöp no' pan, e susun po ora' hat tome' punö' a neöm, köm vaman eah, ka ma kiu kurus nemöm to nok manih peöm, ro akuk ee.

*E Pöl To Soe Vavihvih E Sosoenën, Suk E Timoti'  
To Soe Vanat Poan A Vih Pa Napan Va Tesaronaëka'*

<sup>6</sup> Ivëhkëk, e Timoti' to tane' hah ma' manem peöm, ka kuru va'ih, ne' to tavus en ma' pemöm, pare' te' tane' hah ma' a soe vih manih peöm, pare' vatvus kamöm, pare' soe pan, eöm to öt vakis avoe' rakah e nem po vaman peöm me a taate' iu te'. E Timoti' me to soe kamöm pan, a ma tamoaan nöm to kokoman a no möm, paröm kehkeh ep a no möm. Vamanih pa ö nemöm to kehkeh ep me va ka no neöm.

<sup>7</sup> Ivëh, kën kea, me ra kën vamen, emöm to pënton em, peöm to vaman vakis rakah e nem. E' a tah pamëh to vakikis rakah en po kokoman pemöm manih pa ma punis, me a ma kamis varih nemöm to te'te' nem.

<sup>8</sup> O to'to' pemöm se puh rakah po vaeö pa ö nemöm se nat ka no neöm to sun vakis nem po vaman peöm, paröm vatös me nem e Sunön.

<sup>9</sup> Emöm to te' rakah me nem o vaeö apuh manih pa matan e Sosoenën pea, suk eöm. Emöm to hikta onöt nem a soe vavihvih va antoen eah, suk a ma vaeö varih nemöm to hara' nem.

**10** A ma potan kurus, me a ma popoen kurus, nemöm to hinhin nem manih pa ma kupu pemöm, pan e Sosoenën se vaonöt ka möm, kemöm nö nös ko ep ka neöm. Pamöm he' a neöm a ma taneah nööm to iu nem, marën a vakikis o vaman peöm.

### *E Pöl To Iu Ep Hah Non A Napan Va Tesaronaëka'*

**11** Kuru nemöm to iu rakah nem, pan e Sosoenën e Tamaara, pen Sunön pea Ieesu' Kristo se vamatop ka möm ta hanan, kemöm nö nös manem peöm.

**12** Emöm to iu nem e Sunön pea Ieesu' Kristo se nok a taate' iu te' pe', ke' pu momoaan manih peöm, ko pahan po' na manuh po upöm te', me manih pa napan kurus. Ivëh, köm sih iu nem ro upöm te', vamanih pa ö nemöm to iu vavoh ka no neöm.

**13** Manih pa taate' pamëh ne Sosoenën to vakikis en pa ma kokoman peöm. Ko poen ne Sunön pea Ieesu' Kristo se hah me ma' a nap vivihan pe', e' se ep a neöm o vivihan, no a ma taate' peöm to totoopin, ka hikta hat to te' non manih peöm pa matan e Sosoenën, e Tamaara.

## 4

### *Ea Se Nat No Nonok No A Taate' Te'te'vaasi'*

**1** Kën kea, me ra kën vamen, emöm to vataare voh em peöm pa ma taate' ne eöm se suksuk nem, paröm vavatet nem o iu pe Sosoenën. Eöm to vatet vahik voh em pa ma taate' poë varih. Ivëhkëk kuru, emöm to ihi e nem peöm, pamöm kehkeh vaeh nem a ma kokoman peöm manih pa ëhnan e Sunön pea Ieesu'. Ivëh, köm se makat rakah nem pa nok vavih a ma taate' poë varih.

<sup>2</sup> Eöm to nat vahik voh em pa ma moeh tah kurus, nemöm to soe voh ka neöm a nok, manih po kikis pe Sunön pea Ieesu' Kristo.

<sup>3</sup> O iu pe Sosoenën manih peöm to te' va non manih pan, eöm se he' a ma to'to' peöm manih pe'. Paröm tavus o te' vivihan, ko vaniu këh a taate' rëhrëh, me a taate' te'te'vaasi'.

<sup>4</sup> E' to iu non a ma papaeh peöm se vaasis vavih a matop a taate' vaen. Ko vatet a taate' vivihan va po vaen manih pa sionineöm, me eöm se vavatet nem a ma taate' vih.

<sup>5</sup> Pe' to hat non pa ö no a ma kokoman, me a ma iu hat poë varih se rëh koe va ka neöm manuh pa nok a taate' rëhrëh, vamanih pa ö no te' varih to hikta nat ne pe Sosoenën to nonok va ne sih.

<sup>6</sup> Eöm me, se koe a nok o pöh vu taate' hat pamëh manih pa kën kea, me ma vameneöm varih, a napan pe Kristo, paröm piuk raoe ko nok em pa taate' hat pamëh manih pee. Moaan voh nemöm to soe vakis rakah ke voh em peöm pan, e Sunön se vakmis rakah en pa napan varih, to nonok ne a ma taate' hat to matan va ne nën.

<sup>7</sup> E Sosoenën to vaoe voh a ra, pan ea se te' vivihan no, para vavatet no a taate' vih. Pare' hikta iu a rora se te' no pa taate' hat.

<sup>8</sup> Ivëh, ka ta pah te' se keh pënton varo o vavaasis peö', e' a te' pamëh to hikta pënton varo varoe non o vavaasis peö'. Ahik. E' to pënton varo me en po te' vavaasis pe Sosoenën. O vavaasis pamëh to hikta te' non pan o vavaasis pa te'. Ahik. E Sosoenën koman, e' a Te' pamëh to he' me en pea pa Tuvuh Vasio' pe'.

<sup>9</sup> A hikta tah hah sö' kiun suk ka nös neöm, ta soe

va pa taate' iu te' peöm manih po upöm peöm. Suk ataaeh, e Sosoenën to soe vahik ke voh en peöm, pa taate' iu o upöm peöm.

**10** Oman, eöm to he' voh em pa ma iu peöm manih pa ma kea varih to te' me ne o vaman manih pa muhin vëh Mësadonia'. Ivëhkëk, kën kea me ra kën vamen, emöm to hinhin vakis avoe' e nem peöm pa vakikis a ma kokoman peöm, pan eöm se vataare oah rakah a taate' iu te' peöm manih pa napan poë varih.

**11** Eöm se kiu vëhva' rakah pa nok a iho' vih vakamö' peöm. Eöm se kiu pa ma koreneöm, paröm nok a ma kiu koman peöm, marën a va'aus koman hah ëm. Vamanih pa ö nemöm to soe vavoh ka neöm.

**12** Eöm se keh nonok va nem nën, eöm hikta antoen nem a kökööt ta pah tah. Ivëh, ka napan varih to hikta te' me ne o vaman, ee se ta e ne peöm. Köm hikta antoen nem a han hah manih po upöm te', pa ma taneah nöm to iu nem.

### *E Sunön Se Hah Ma', Pare' Ununun A Ra*

**13** Kën kea me ra kën vamen, emöm to iu nem a ö nöm se nat vavih pataeah se tavus amot manih pa napan pe Kristo varih to mët voh ee. Ivëh, ke' hat non peöm tome' tamak vamanih po te' varih to hikta te' ne to vaman manih pe Sosoenën. Pare hikta te' vamatop anoeh ne a sun tane' hah pea manih po vaseepe.

**14** Ea to vaman no e Ieesu' to mët voh en, pare' sun tane' hah en pa nap mët. Ivëh, ka nat e no po kikis pe Ieesu' ne Sosoenën se kuin hah en po te' pe Kristo varih to mët voh ee. Kee pët hah me ee ma' pe'.

<sup>15</sup> Emöm se soe va ka neöm manih pa soe pe Sunön. O poen ne Sunön se hah ma', ke ea a napan varih to te' to'to' no manih po oeh, ea to hikta onöt no a vovoh ke ra napan varih to mët momoaan voh.

<sup>16</sup> E Sunön se to vakis rakah en ma', ke susun po ankero' se vakoko ma', ka suvin pe Sosoenën tanih en ma', ke Sunön kunah këh en ma' pa vöön va kin, Ka nap mët varih to vaman ne e Ieesu'. Ee a napan poë varih se kon o to'to', pare sun momoaan hah ee.

<sup>17</sup> Manih po poen pamëh ne ea varih a napan to te' to'to' avoe' no, e Sunön se ununun a ra, pare' me peah va'peh en pea manuh akis me ra napan varih to mët voh ee. Ka vatatan me ee pe Sunön, para te' va'peh tamoaan me e no pe'.

<sup>18</sup> Ivëh, köm se sun vakis, paröm vatvus ke ra ma napan pe Sosoenën a soe pamëh, ka soe pamëh sih vakikis a ma kokoman pee.

## 5

### *Ea Se Anoeh Vavih No O Poen Ne Sunön Se Hah Ma'*

<sup>1</sup> Kën kea me ra kën vamen, emöm to hikta onöt nem a kiun to kiun to soe vanat a neöm o poen, me a aoa' poanheh, no a tah pamëh se tavus ma'.

<sup>2</sup> Eöm to nat vavih e nem po Poen ne Sunön se hah ma' manih po oeh vëh, e' se vöhkak rakah a neöm. E' se nö va ma' manih pa ö no a te' kakaveo to pön va ma' pa popoen.

<sup>3</sup> A napan se vavasoe e ne pan, "Kuru e' o poen te' vavih pea, na se te' vakamö' no." Ivëhkëk varu' rakah va ko manih, no a tah vëh se mirö' raoe, se

tavus vëhö' en pee. Ke' te' va e non manih po kamis apuh vëh to tatavus non pe köövo to kehkeh vahuh non e koa'. A napan poë varih to hikta antoen ne a vaniu këh a tah pamëh.

<sup>4</sup> Ivëhkëk, kën kea me ra kën vamen, eöm to hikta te' nem pa popoen. Ivëh, no Poen hah pe Sunön to hikta se vatoksean suk a no neöm, köm töhkak va em manih pa ö no a te' to ep in a te' kakaveo to nö ma'.

<sup>5</sup> Eöm kurus rakah a napan va po maaka me pa potan. Ea to hikta te' no pan, ea a napan va pa popoen.

<sup>6</sup> Ivëh, ka se nat no te' va nö manih po upöm te' varih to koroh ne sih. Ivëhpëhkëk, ea se te' vamatop tamoaan no, para opoep no, ko te' me no o kokoman maaka.

<sup>7</sup> Ea to nat vavih e no pa napan varih to koroh ne sih, ee to koroh ne sih pa popoen. Ko te' varih to kakaak ne sih, ee to kakaak ne sih pa popoen.

<sup>8</sup> Ivëhkëk, ea a napan va pa potan. Ea se te' natsean no, para matop hah a no. Ea se kon rakah a taate' vaman, me a taate' iu te', kee te' va ne manih po käpro' to sunpip a rora, ko matop e ne pea. Ea me se kon a taate' anoeh vamanih pa ö ne Sosoenën to kon hah voh en pea këh a hat. Ka taate' pe Sosoenën pamëh, se te' va non manih po uvan eh vavapus me, ne ea to uvan no.

<sup>9</sup> E Sosoenën to hikta kon voh a ra marën a vakmis a ra, Ahik. E' to kon koe hah voh a ra manih pa mët pe Ieesu' Kristo.

<sup>10</sup> Suk ataaeh, e Ieesu' to mët voh, marën a va'aus a ra. Ivëh, ka se pët te' va'peh me no eah po poen na to te' to'to' no, ke', ea se mët, po poen ne' se hah ma'.

**11** Ivëh, ke eöm papaeh se he' a ma soe vih, marën a vakikis a ma meh peöm. Vamanih pa ö nöm to nonok va nem manih kuru.

*E Sosoenën To Antoen E Non Pa Va'aus A Napan  
Pe Kristo, Kee Kon A Ma Taate' Vih Oah*

**12** Kën kea me ra kën vamen, kuru nemööm to ihi e nem peöm pan, eöm se ta nem a napan varih to kiu ne topnineöm. Kee vovoh ka neöm manuh pe Sunön, ko vavaasis a neöm pa taate' pa napan to vaman ne e Kristo.

**13** Eöm se ta nem raoe, ko kë nem a ëhnëëre manih pa taate' iu peöm, suk a ma kiu nee to nonok ne. Paröm vapöh kokoman nem topnineöm.

**14** Kën kea me ra kën vamen, emööm to ihi e nem peöm pan, eöm se soe vanatsean ke ro te' varih o karauh. Paröm kunkuin o kokoman po te' varih o nanaöp. Ko va'aus o te' varih o sunë. Paröm kunah, ko te' me nem a taate' tö manih pa napan kurus.

**15** Eöm se te' vamatop nem, paröm nat va nem manih pan, e' to hikta vih non pa piun a hat no a meh te' to nok manih peöm. Ivëhkëk, eöm se sun vakis nem pa nok ataeah to vih non po epep po upöm peöm, me a napan kurus.

**16** Eöm se te' vaeö tamoaan nem,

**17** paröm hinhin tamoaan nem pa ma poen kurus.

**18** Ka ma taneah ro to tavus ne manih peöm, eöm se soe vavihvih ke na e Sosoenën. Ke Sosoenën koman to iu a no neöm a napan varih to vatös me voh e Ieesu' Kristo, pan eöm se nonok nem a ma taate' poë varih.

**19** O poen no a Tuvuh Vasio' se keh kuin o koko-man peöm pa nok a kiu pe', eöm se nat nem sunpip a soe pe'!

**20** Paröm nat nem pënton varo a soe vanënën.

**21** Ivëhkëk, eöm se iniinan vavih pa ma soe, me a ma taate' varih no o te' vanënën soe to soe ka neöm. Paröm öt vakis a soe me a ma taate' vih varoe.

**22** Ko vaniu këh nem a ma vu taate' hat.

**23** Eö' to hinhin no' e Sosoenën koman, pan e' se he' a neöm a taate' moomo pe'. E' to nok a neöm, köm he' kurus em pa ma to'to' peöm manih pe', ko tavus em o te' vivihan. E' me se matop vavih e non pa tuvuh peöm, me o apen, me a ma sionineöm no ahikta hat to te' ne manih pee. Kee te' vavih e ne, ko antoen po Poen ne Sunön pea Ieesu' Kristo se hah ma'!

**24** Eöm se vaman rakah nem a te' vëh to vaoe voh a neöm, ivëh, e Sosoenën. E' se nok ken peöm pa ma moeh tah kurus, kee tavus ee manih peöm. Suk e' to vavatet non a soe man pe'!

**25** Kën kea me ra kën vamen, eöm se hinhin va'aus a no ma' möm.

**26** Manih pa taate' pea a napan pe Sosoenën, a ma papaeh peöm se he' a soe vavihvih vivihan pe' manih pa ma upöm peöm, pa ö nööm to vatötönun.

**27** Eö' to soe vakis rakah ka neöm, manih pa ëhnan e Sunön pea, Ieesu' Kristo, eöm se ëhëh rakah nem o kiun va'ih manih po te' kurus varih to te' me ne o vaman.

**28** Eö' to hinhin no' pan, o ururuan pe Sunön pea Ieesu' Kristo se te' tamoaan me a no neöm.

**SOE A TO'TO'**  
**The New Testament in the Vasui (Tinputz) Language of**  
**Papua New Guinea**  
**Nupela Testamen long tokples Vasui long Niugini**

copyright © 2004 Wycliffe Bible Translators, Inc.

Language: Vasui (Tinputz) (Tinputz)

Dialect: Vasui

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-08

---

PDF generated using Haiola and XeLaTeX on 18 Apr 2025 from source files  
dated 31 Aug 2023

f779a4b1-4c33-58ed-ae43-2686ceb877fb